

Class 603 "Not' Libèrté" par FMH (Florence M. Hacquoil)

Not' pèpè voudrait saver
Où'est qu'est don not' libèrté?
Quand un homme au jour d'aniet
Dé bâti n'a pon lé drouait.

Ch'avait 'té sèn întention,
Dé bâti eune belle maïson,
Où'est qu'i' pouôrrait s'èrtither
Et un gardîn tchultiver.

I' n'avait pon réalisé,
Qu' ch'est ès Conmités dé décider,
S'il étha la pèrmission
Dé faithe autcheune construction.

Même s'i' vos pèrmettent dé bâti,
La maïson nou n'peut couvri
En tuiles, s'il' ont décidé
Qu'les ardouaises f'thaient sa bieauté.

Nos anchêtres au temps pâssé,
Dans lus caves au bord d'la mé,
N'avaient pon de Conmités
Dé la sorte à les c'mander.

S'ou voulez chonna changi,
Et les contrôles aboli;
Chouaïsissiz comme Député
Un houmme tch'aime not' libèrté.